



Sarajevo, 10.06.2022.

EKONOMSKI FORUM BOSNE I HERCEGOVINE 2022

Zapadni Balkan u kontekstu globalnih izazova održivog razvoja i zelene ekonomije

Šesti Ekonomski forum Bosne i Hercegovine će biti održan 28. juna/lipnja 2022. godine u hotelu Hills Sarajevo. Glavni govornik (keynote speaker) Foruma 2022 je Ismail Serageldin, dopredsjedavajući Nizami Ganjavi International Center i nekadašnji dopredsjednik World Bank (1992-2000).

Program Ekonomskog foruma BiH 2022 je koncipiran u dvije panel sesije:

1. **GLOBAL CHALLENGES AND WESTERN BALKANS: SUSTAINABLE DEVELOPMENT RESILIENCE, RESTART AND RECREATION** (Globalni izazovi i Zapadni Balkan: otpornost, restart i redizajniranje održivog razvoja)
2. **MOBILIZING GREEN FINANCING TO RESTORE AND ACCELERATE THE SDGs PROGRESS** (Mobiliziranje zelenog finansiranja za obnovu i ubrzanje napretka ciljeva održivog razvoja)

U prvom panelu o globalnim izazovima, zajedno sa **Ismailom Serageldinom**, govorit će **Ismahane Elouafi**, glavna naučnica u Organizaciji za hranu i agrokulturu (FAO) Ujedinjenih nacija, **Jeffrey Sachs**, predsjednik Liderskog savjeta Svjetske mreže rješenja samoodrživog razvoja (SDSN), **James Stewart**, predsjednik Uprave Raiffeisen BANK dd Bosna i Hercegovina, i **Jasmin Mahmužić**, direktor Agencije za bankarstvo Federacije BiH. Moderator prve sesije je **Zlatko Lagumdžija**, profesor na Ekonomskom fakultetu Univerziteta u Sarajevu.

O mobiliziranju zelenog finansiranja u svrhu obnove i ubrzanja napretka realizacije ciljeva održivog razvoja govorit će **Ivana Vojinović**, direktorica Centra za klimatske promjene, prirodne resurse i energiju pri UDG-u (Univerzitet Donja Gorica) i bivša generalna direktorica za životnu sredinu u Vladi Crne Gore (2011-2021), **Senida Mesi**, bivša premijerka Albanije (2017-2019), sada u svojstvu predsjednice Centra za ekonomski razvoj i okruženje (EDEC) i članica izvršnog odbora Regionalne akademije za demokratski razvoj (ADD), **Kemal Kozarić**, ambasador Bosne i Hercegovine u Republici Austriji i nekadašnji guverner Centralne banke BiH (2005-2015), **Adnan Delić**, ministar privrede u Vladi Kantona Sarajevo, te **Jasmin Hošo**, CEO kompanije Tondach Bosna i Hercegovina. Moderator druge sesije je **Branimir Muidža**, generalni direktor HeidelbergCement grupacije u BiH i Hrvatskoj, generalni direktor Tvornice cementa Kakanj d.d. i predsjednik Vijeća stranih investitora BiH.

Ekonomski forum Bosne i Hercegovine 2022 će otvoriti **Jasmina Selimović**, dekanesa Ekonomskog fakulteta u Sarajevu, **Šefik Džaferović**, predsjedavajući Predsjedništva Bosne i Hercegovine i **Edin Forto**, premijer Vlade Kantona Sarajevo.



U fokusu ovogodišnjeg Ekonomskog foruma BiH su izazovi koji su pred civilizaciju postavljeni u postpandemijskom, globalno kriznom vremenu i otpornost održivog razvoja, te uloga *zelenog finansiranja* u postizanju ciljeva održivog razvoja u svijetu i Zapadnom Balkanu. Pojam održivog razvoja najčešće se dovodi u vezu sa zaštitom životne sredine, planiranjem društvenog razvoja, ekološkim, ekonomskim i političkim pitanjima. Održivi razvoj spaja ujedno brigu za živi svijet na planeti Zemlji i za očuvanje kapaciteta prirodnih resursa sa društvenim i ekološkim izazovima koji stoje pred svakim društvom, državom i čovječanstvom kao cjelinom. Pandemija virusa COVID-19, kao i rat u Ukrajini dodatno su naglasili globalne izazove koji prate održivi razvoj kako na području Zapadnog Balkana, ali i čitavog svijeta. Aktualnosti pojma održivog razvoja naročito doprinose izazovi koji dolaze s ugroženošću životne sredine. Zelena ekonomija je u poslednjih par godina promovisana kao velika promjena u razmišljanju i smatra se za jedno od mogućih uspješnih rješenja za poboljšanje ekonomskog rasta a istovremeno smanjenja potrošnje resursa i sprječavanje uništavanja ekosistema.

Organizatori Ekonomskog foruma Bosne i Hercegovine 2022 su Ekonomski fakultet Univerziteta u Sarajevu i Ekonomski institut Sarajevo. Ovogodišnji Forum je organizovan u okviru aktivnosti obilježavanja 70 godina postojanja Ekonomskog fakulteta u Sarajevu. Od svog osnivanja (1952. godine) Fakultet je opredjeljen na aktivno društveno djelovanje u zajednici. Organizacija Forum predstavlja jednu od aktivnosti kojima se nastoji dati doprinos društvenoj zajednici i podsticaj na pozitivne ekonomske promjene u našoj zemlji. Osnovna ideja Forum je uspostavljanje jedinstvene platforme koja povezuje predstavnike poslovne zajednice, akademije i kreatora ekonomskih politika, a sa ciljem promocije preduzetničkih inicijativa i partnerstava, kultivacije javno-privatnog dijaloga i prezentacije naučnih i tehnoloških rješenja za promicanje održivog razvoja naše zemlje i regije.

Partneri Ekonomskog foruma BiH 2022 su: Fondacija društva zajedničkih vrijednosti (SSV), Nizami Ganjavi međunarodni centar (NGIC) i Mreža rješenja održivog razvoja Zapadnog Balkana (WB SDSN), uz prijateljsku podršku partnera i sponzora.

Učešće na Ekonomskom forumu BiH 2022 je otvoreno bez plaćanja kotizacije, ali uz obaveznu prethodnu registraciju.

Više informacija i obrazac za registraciju nalazi se na web stranici Forum: <https://ekonomskiforum.efsa.unsa.ba/>

Ured za odnose s javnošću

Lejla Sinanović

033 253 786

062 854 051